

GOBIERNO TA PIDI PERSONANAN SIN TRABAJO PA REGISTRA

AVION DI EJERCITO COLOMBIANO A CAY CU 80 HENDE ABORDO

BOGOTÁ: Un avion di transportacion di Fuerza Aerea de Colombia, cu entre 72 y 80 hende abordo a cay ayera despues di a subi na aeropuerto di Leticia parti Sud este di e pais.

Helicoptronan a logra haya restonan di e avion rapidamente despues pero no por a determina si tabata tin sobrevivientenan.

Un vocero militar na Bogota a declara cu tabata tin 76 pasahero y 4 miembro di tripulacion abordo di e avion cu tabata tin Bogota como destino.

For di otro fuentenan a ser bisa cu en total tabata tin 72 persona abordo.

Segun funcionarionan di aviacion civil ta awe numa gruponan di rescate por yega na e restonan di e avion. E helicoptronan cu a localisa e restonan di e avion ayera no por a baha pa motibo di mal tempo y oscuridad.

Corto tempo despues di a subi piloto di e avion DC-6 a informa cu un di su cuatro motornan a pega na candela y un rato despues contacto cu e avion a kibra.

E avion di fuerza aereo di Colombia a ser usa pa transportacion di civilnan despues cu dialuna pilotonan di e compania nacional Avianca y SAM a drenta huelga exigiendo sueldonan mas halto.


Segun ultimo informacionnan ricibi ayera anochi, aparentemente tin sobrevivientenan di e desgracia aki. Segun General Enrique Diaz di fuerza aereo di Colombia a declara ayera anochi, e posibilidad aki ta existi.

E avion a cay durante un tormento di awacero
Sigui lesa pag. 15

PARIS TA PIDI SANCIONNAN ECONOMICO CONTRA SUD AFRICA

NEW YORK: Paris lo pidi pa sancionnan voluntario economico wordo tuma contra Sud Africa, den un resolucion di Consejo di seguridad di Nacionnan Uni. For di fuentenan diplomatico na Paris a ser bisa cu den e asamblea di e Consejo di Seguridad awe merdia, e peticion lo ser haci.

Durante e reunion aki lo papia di e situacion na Sud Africa y e situacion di emergencia cu a ser decreta den 36 distrito di e pais, y e ola di detencionnan di esnan contra e gobierno di Apartheid. Entre e medidanan cu Francia ta propone ta pa e miembronan suspender tur inversion nobo planea pa tuma lugar na Sud Africa, prohibicion di importacion di Krugerrand, e moneda di oro Sud Africano, suspension di garantianan pa credito pa exportacion pa Sud Africa, prohibicion di cualquier contrato nobo ariba tereno nuclear, y prohibicion di venta di material di informatica cu por ser usa door di polis of ehercito Sud Africano. Ta ser pidi den e texto tambe pa un condena energetico di e politica di Apartheid na Sud Africa.



Diario

DI ARUBA

Bo Matutino
Netamente Arubiano

DIAHUEBS 25 JULI 1985

AÑA 4, No. 1379

VENEZUELA A GANA ARUBA AYERA

ORANJESTAD (AAN)—

Ayera e expectativa grandi tabata, con ta para cu e partido di Aruba contra Venezuela pa mira si nos muchanan ta pasa pa

final si of no den e campeonato Latino Americano na Mexico.

Lamentablemente mester informa awe cu nos

muchanan a perde e partido aki, den ultimo oportunidad di bate di e venesolanonan. Relato di esaki por lesa na pagina 9 di e edicion aki.



Ayera por a ripara na waf cu AIG mester a manda pa Venezuela un cantidad di botter di gas industrial pa ser yena. Segun informacionnan lo dura mas o menos 3 siman pa e botternan yega Aruba yena atrobe.

Antes tabata haya e gas industrial aki for di Lago pero desde cu e refineria a sera su portanan, e compania mester a importa gas industrial mescos cu Arugas a haye obliga di importa gas pa cushina for di exterior tambe.



Despues di amensaa di caymento di pidanan di decoracion na e edificio bieuw Commercial Building den Wilhelminastraat, ayera pa segundo vez den corto tempo truck di brandweer mester a acudi na e edificio pa kita plaanchinan cu ta menaza di cay y cu lo por causa daño na propiedad di hende of na hende mes.

Ayera atrobe mester a desvia trafico pa haci e trabao aki. Ta varios aña caba cu gobierno di Aruba a cumpra e edificio pa un dineral y nunca a haci algo cune, te cu el a decaí completamente y ta un peligro cen centro di ciudad.